

ÆS O P I

¶ De Vulpe, & Larua.

Vulpes cū in mimi domum profecta esset, singulaq; eius vasa considerasset, laruæ caput inuenit summo artificio fabricatum: quod cū in manibus sumpisset, ait: O quale caput, si cerebrum haberet.

Fabulæ explicatio.

Hæc fabula pertinet ad homines, corpore quidem illustres, animo verò inconsultos, & dementes.

¶ De Carbonario, & Fullone.

Carbonarius cū in domo quadam habitaret, fullonem rogabat, vt ad cum eo habitandum immagriret. Fullo autem respondens ait: Non equidem id facere possum, malè enim metuo ne quæ ego dealbauero, fuligine tu repleas.

Fabulæ explicatio.

Hæc fabula nos docet, eos, qui dissimili ingenio sint, societatem colere non posse.

¶ De Piscatoribus.

Quidam piscatores suum rete trahebant, quod cū graue esset, lætabantur, atq; exultabant, multam prædam inesse existimantes: verū cū illud ad littus subduxissent, pauculos quidē pisces inuenerunt, lapidem verò satis grandē. Cœperunt itaq; ea ex re maxima tristitia & mœrore affici, non tam quidem ob piscium paucitatem, quàm quòd contrariam opinionem animo conceperant

Qui-